

Bond

I

Pos de chantar m'es pres talenz,
farai un vers don sui dolenz:
non serai mais obedienz
en Peitau ni en Lemozi.

II

Qu'era m'en irai en eisil;
en guerra laisserai mon fil,
en gran paor, en gran peril;
e faran li mal siei vezi.

III

Lo departirs m'es aitan grius
del seignorage de Peitieu;
en garda lais Folcon d'Angieus
tota la terra e son cozi.

IV

Si Folcos d'Angieus no'l socor
e'l reis de cui ieu tenc m'onor,
guerreiar l'an tut li plusor,
felon Gascon et Angevi.

V

Si ben non es savis ni pros
cant ieu serai partitz de vos,
vias l'auran tornat en jos
car lo veiran jove mesqui.

VI

Merce clam a mon compaignon,
s'anc li fi tort, q'il m'o perdon;
et il prec en Jezu del Tron
en romans et en son lati.

VII

De proeza e de joi fui,
mais ara partem ambedui;
et eu irai m'en a scellui
on tut peccador troban fi.

VIII

Mout ai estat cuendes e gais
mas nostre Seigner no·l vol mais;
ar non puesc plus soffrir lo fais
tant soi aprochatz de la fi.

IX

Tot ai guerpit cant amar sueill:
cavalaria et orgoill;
e pos Dieu platz, tot o acueill,
e prec li que·m reteng'am si.

X

Toz mos amics prec a la mort
que·il vengan tut e m'onren fort,
qu'eu ai avut joi e deport
loing e pres et en mon aizi.

XI

Aissi guerpisc joi e deport
e vair e gris e sembeli.

- letto 935 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/bond-8>